

西域圖志



西域圖志



欽定皇輿西域圖志卷之二目錄

圖考二

西域山脈圖

西域水道圖

藩屬

左右哈薩克部圖


東西布魯特部圖

霍罕安集延瑪爾噶朗那木干塔什罕部圖

拔達克山博洛爾布哈爾諸部圖

愛烏罕痕都斯坦巴勒提諸部圖

西域山脈圖



欽定皇輿西域圖志卷之二

西域山脈圖說

大地羣山之脈。自西而東。其在中土。唐浮屠一行。嘗論河山兩戒。謂北戒自三危積石。負終南地脈之陰。東及太華。逾河。並雷首。底柱。王屋。太行。北抵常山之右。乃東循塞垣。至濊貊。朝鮮。南戒自岷山。蟠冢。負地脈之陽。東及太華。連商山。熊耳。外方。桐柏。自上洛。南逾江漢。攜武當。荆山。至於衡陽。乃東循嶺徼。達東甌。閩中是也。其在

西域自西南而東北。按其統宗起脈之處在西藏極西鄙之岡底斯山。直陝西西寧西南五千五百九十餘里。地勢由西南徼外以漸而高。至此爲極。

本朝康熙五十六年。遣使測量。以此處爲天下之脊。衆山之脈。皆發於是。其分幹有四。向西北者爲僧喀巴布岡里木遜諸山。繞阿里而北。蜿蜒起伏。以趨西域。是謂葱嶺。葱嶺爲西域西南境。自葱嶺而東。分爲兩大幹。漢書謂之南北山。其南

山由今葉爾羌西之杭阿喇特達巴分支。經葉爾羌和闐南境。屬回部舊疆。由是綿亘而東。岡嶺連屬。經安西州南。又東至陝西肅甘涼三州南。又東南達於苦水堡。其東南一支。南包青海。又南爲庫爾坤。隨河水曲折而東。入陝西岷州界。繞渭水之南而東。爲武功太白太乙諸山。又東北達於太華。是卽一行所謂北戒。但當日不知從西域之南山。一脈分承。故直以三危爲北戒之首也。其北山。由葱嶺分趨東北。循烏什阿

克蘇庫車之北。至於伊犁。乃折而東。又經迪化
州之南。闢展之北。直走鎮西府。哈密。東至於塔
勒納沁鄂拉。總名天山。其間土名。隨地而異。蓋
以百數。最著者曰木素爾鄂拉。曰汗騰格里鄂
拉。曰博克達鄂拉。在古則曰白山。曰雪山。曰靈
山。唐時又稱折羅漫山。是在北戒之北。東西綿
亘西域境內。一行所未及推論者。自塔勒納沁
鄂拉。折而西北。爲天山分幹。遠逾沙磧。是謂漠
北之阿勒坦鄂勒。卽古金山。又爲漠北諸山之

祖。當西域之東北境。山分四支。延袤二千餘里。
北一支入俄羅斯國。東一支。又東北一支。又東
南一支。並入喀爾喀境。不詳載。其自阿勒坦鄂
拉西麓分支者。爲阿拉克鄂拉。博克達烏魯罕
鄂拉。又一支爲奇喇鄂拉。阿爾察克鄂拉。西抵
額爾齊斯郭勒東岸而止。其別自天山分支西
北行者。一支控伊犁之北。爲博羅布爾噶蘇鄂
拉。塔勒奇鄂拉。博羅和洛鄂拉。又折而東北行。
經千有餘里。至塔爾巴噶台鄂拉。朱爾庫朱鄂

拉東抵額爾齊斯郭勒西岸。又一支自伊犁郭勒北西北行。至庫隴奎鄂拉。格登鄂拉。又一支自伊犁郭勒西北分支西行。經圖斯庫勒北。又一支經圖斯庫勒南。西北行。至吹郭勒南。又一支亦西北行。經塔拉斯郭勒南。皆屬準部舊疆。爲天山北麓分支。尤一行所未及推論者也。故推究西域山脈。斷以西藏之岡底斯爲來龍。以中土之北戒諸山。漠北之阿勒坦諸山。爲南北兩大山之支幹。經絡方隅。井然明辨。今志西域

其山岡土石並詳山志各卷。而先爲備論其全勢之首尾。繪諸尺幅。俾世之談堪輿者有所考。往代中外未通。憑臆懸揣。端緒淆誤。漢武以南山爲崑崙。一行據三危爲經首。郭璞有云。名實相亂。莫矯其失。蓋自昔言之。我

國家德威廣被。西藏。青海。漠北。蒙古諸部落。凡在西域左右者。納土獻圖。久爲臣僕。今西域蕩平。殊方內附。爰得綜攬天下名山之全局。原其所自始。而究其所終極。一岡一阜。咸在階闥。顯坤

與自然之條理。正千古積習之沿訛。猗歟盛哉。

西域水道圖